

Äppel plöcke in Owezesse

E Familiejeträfe onesch freiem Himmel

Marianne Breuer

Os Mama ihr Kommuniionsjesell woo jestorwe. Weil die Zwä ihr Lewwe lang die Freundschaft obresch erhaale on jeffläsch hann, hann ech et als mein Flisch anjesehn, met ob dat Bejräfnes ze john.

Der Kireschhoff enn Owezesse leit Südhang, ech leet trotz dem traureje Anlass mein Ore rond john. Sooch dat Döref am Foß der Olbröck, boo os Mama, die at etlesche Joh'e dut ess, dehäm woo on jruss ess wure. Ech, sooch de Buebäresch vür me lei'e, bo onne am Foß de Sauebrunne, „de Bu'e“, lööf. Et vejing käne Besuch enn Owezesse boo os Mama net soot: „Kenne, loft me äs flott jet Bu'e holle, doo hann ech su rischdesch Loss trop.“ Aus em kläne Rüh'e koom dat kossbare Wasse, mir leeten en Stitz voll loofe on brachten et ihr. Me soch dat se et met Häbhonge tronk. Bie se späde krank on ihr Daach jezellt woren, hat se ömme nur äne Wunsch, en Flasch Bu'e von dehäm.

Och soch ech de Bu'ebeschwäsch der Richtung „Häbesch“ jing, boo jedes Joh'e em Häres

Appel jeplöck wuren. Ech merk obämol bie mir e Lache üweret Jesisch husch, janz scheu hann ech äs links on rächs jeguck on hann bei mir jedach: „Hoffentlesch hät dat kä Mönsch jesehn, bat murren die von dir denke?“ Doch dann hann ech mech zo Räsong jerof, mein Ore von allem lossjeresse on mech dotrop bedaach, dat et jo nau wirklesch net de richdeje Zeit on O'et woo für die Jedanke die ech hat. – Dehäm hann ech me owends der Daach noch äs loße durch de Kopp john on fonn et anjebrach alles obzeschreiw, bat mech su bewäch hät. –

Os Mama koom joo, bie jesoot aus em Ländsche, aus e kennereische Famillesch, bie dat em alljemäne üblesch woo. Os Mama wo et zwät jöng's von neun Kenne, 1908 jebore. Noo em Duut von de Äldere tritt jedes Kend sei Ärefdäl an. Der jöngste Brode, de Kaal hät et Haus anjehollt, sein Fro woo aus Dädemesch „Jassepittesch Jret.“ Zom Ädeleje Haus huut och noch e Boomfeld enn de „Häbesch“ met em jode Dääl Äppelböm drop, allehand Soote, die



*E kennereische
Famillesch*



E Boomfeld met Äppelböm

me heut nemmie kennt. Et woo der Äldere ihre Welle, dat sech no ihrem Duut all Kenne noch bestemte Johre Appel plöcke könnten. Su woo dat jedes Joh'e für all Geschwiste, äwe och für os Kenne en besondere Daach, e Familiejefess onesch freiem Himmel, bo sech all et ganze Joh'e drop frooten.

Wenn et em Häres su weit woo, dat de Äppel reif woren, hät de Ohm Kaal alles enn de Wääch jelät on en Daach anjesatt bo se jeplöck wuren. Et woo ejal öff et Anfang, Mette ode Ende Woch woo, alles fonn sech an dem Daach enn met Kend on Kejel. Heut wör dat ausjeschlosse se all onesch äne Hoot ze kreie. – De Owend vür dem bestemte Daach stoon os Mama on mir Kenne at om Kopp. Os Mama wo ömme drop bedaach, dat de Köh beschlon on de Ware in Ordnung wor. De Owend fürher wuren de Rädde on de Rämm noch met Kareschmä'e jeschmä'et. Ob de Kasteware koomen jet Pongere Strüh, Manne, Köref, en Äme on en Krampe, net ze vejäase. De Läde wu owetrüwwe jelaach on met em Sälche aus Strühkont fassjebonne. Bat os Mama ömme debei hat woo en Nutmäsch on en Hamme, em

Fall dat en Zooch kabott jing. – Annere morgens dann, enn alle Herrjottsfröh wu et Veh jefodet, de Köh jemolek on de Melesch vesoresch, all hamme met anjepack. Noo em Kaffee trinke wuren de Köh enn de Ware jespannt. Mettlerweile woren die Löhndörwe mem Oosefuhrwerk on die Senzeje met de Fahrrädde och at doo, on et wu sech zesamme ob de Wääsch noo Owezesse jemaach.

Et joof e su vill ze vezelle die Mäule stoonen net stell, die Zeit vejing bie em Fluuch. Wenn me durch de Raupebösch fuhren, komen jewöhnlech och die Heppengene at met de Rädde. Et wu sech met Handschlach bejröß, doch dann fuhren die at weide. Enn Owezesse ankunn heelen me bei de Tant Paula an on guckten äs flott, öff die at fott wören. Bie me durch et Döref fuhren, wuren me at von Bekannte bejröß, se reefen os zo: „Jung ihr seit äwe at hell.“ Me sein am Bu'e langs, hann den räch's lei'e loße, on sein links öm de Krömm de Bu'ebesch erop. Der Wäsch no Jolemeresch/ Brenk hamme üwwequert, dann woreme en de „Häbesch,“ dat woo net weit von de Niddezzessene Schul. Von weidem huut me die annere at schratele on sech zorofo, die sech at enjefonne on enn de Bööm hingen. Die Owezessene, Niddedüremeje on die Jolemereje hatten jo net weit, et wo joo nur en Katzesprong. De Ohm Mechel aus Annenach koom ömme at de Daach vürher bess bei de Ohm Kaal. Die Fröd wo jruß bie mir ankoomen, et woo jo net alldächlech dat me sech sooch. Mir Kenne hann et Veh ausjespannt on enn de Wiss jepölt, Os Mama reef: „Kenne, nau hat dat Veh em Ooch net dat se lofe john.“ Jeder moch sech an de Arbet et moot jo allehand jeschaff wäre. Pönklech, baal ob de Menut, beim Mettdachläude, koomen die jode Jeister aus Zesse, Düremech ode Jolemerech mem Ässe anjeschlepp für all die hongereje Mäule. Et wu sech vürher ömme affjeschwatt ber koch, et jing reiömm. Wenn et heesch „äße kunn,“ dann woren se all flott bei de Heck. Die Arbet on de frörsche Loff mochen hongeresch on düschdesch. Jewöhnlech joof et en decke Supp met Pudding, ode Döppscheskooche met Appelschmär. Maneschmols joof et och Ribbelsches Supp, dann hatten mir Kenne Kermes. Wenn se all, klän on jruß en de Rönd soßen, jeder seine Telle om

Schuuß, hät me soon könne: „Doo leien se bie die Jünger am Ölberesch.“ Woo de letzte Ress aus em Döppe jekraz, jing e deck Lob an die, die su joot jekoch hatten, all woren se ronderöm zefridde. Me konnt net lang pause, denn die Zeit leef devon. Spätnommeddachs woren die Bööm suweit leddesch jeplöck bess ob jet Äppel für de Mätteskenne on de Vüjfel. Onnesch jedem Boom loch en Hoff ode e Hööfje **schöne Äppel**, Boskop, Wenterabö'e, Bunneäppel, Malmedine, Joldrenette on bie se all heeschen. **Alles** wu **redlech objedäält**, domet dat jeder von jede So-ot jet krisch. Mir Kenne holefen düchdesch met on rafften de **Falläppel** en **Säck für Appeltrank** ze mache. Wenn alles su weit vestiwwelt woo, die Äppel om Ware fein deck enn Strüh vepack, domet se om **Hämwäch** durch die Schöggelerei net jepötz on jeplötsch wuren. Die Lade wu widde om Kasteware fassjebonne, et Veh, bat Jott sei Dank satt woo, wu dann enn de Ware jespannt. Doch ieh et ob Richtung häm jing, wu sech noch äs bedank für der schöne Daach, dat joo de Ässe on für die ville Arbet, die se sech jemaach hatten. Doch käne empfun et als Lass, et wo eben Selbsveständlechkät. Me hat **dat Zesammesein** jenosse, all hatten nur äne Wunsch: „Hoffendlech jitt et nächs Johr och widde Äppel.“ Beim lezte Zorof: „Nau kutt joot häm,“ jing et Richtung Zesse bess Dädemesch, Löhndorf woo joo noch e jood Stöck. Die enn de Nöh wannten, guckten noch noo em Rächte, öff och käne jet lei'e jeloß hat. Et woo für all **en stramme Daach**. Bie mir mem Fuhrwerk äs Owezesse em Röck on der Beresch am Kirchhoff

erop jepack hatten, jing et nur noch jeleich üwe durch de Raupebösch zeröck. Weil der Ware joo beladde woo, mooten me häm nur ze Foß loofe, jet hepp ze bleiwe hann mir Kenne os net jetraut, denn et wu at jet deuste. De Mond guck ab on zoo duersch de Woleke, die Burch Olbrück soch su jespänstech aus wenn dann noch en Zoch ‚Hoolejänse‘ met ihrem Jeschraatel üwe os fott fluch, hann mir Kenne os janz disch annenanne jedaut.

Mie bie äs hamme os veschreck, wenn e Kneinsche vür os üwe de Wäsch leef ode en Vurel von em Boom obfluch. Wenn me dann ob de Roddehüh woren on de Lichte von Dädemech sehn konnten, hamme all objeödemp. E Stöck mooten me noch üwe de Neu Stroß. Domet os käne ob der Ware obfuhr, wu de Lüsche, en Petroleumslamp anjemaach, die me vürsechshalewe metjehollt hatten. Äwe zoo der Zeit, koom joo noch alle Schaltjoh esch äs e Auto. **Dehäm** ankunn, wuren de Köh ausjespannt, jemolek. Der Ware wu met Sack on Pack en de Scheue jedaut, dann hüren ech os Mama soon: „Kenne, nau ess et jenooch für heut, trenkt noch en Tass Melesch on dann nix bie enet Bett, mo'e ess och noch en Daach.“ Mir woren äwe och **hondmöd** on sein bie en naaße Sack enet Bett jefalle. **Allehäleje** trofen sech die Jeschwiste widde all em Älderehaus beim Ohm Kaal, dann wu der Daach enn de Häbesch noch äs ob Tabet jehollt, die Äppel wuren bestrons, et joof joo nirjens bessere, se woren joo von dehäm. Beim Ause-nannejohn mänten all: „**Me fröhen os at widde ob nächste Härres, su Jott well.**“